

МЕСЯЦА АВГУСТА В 5-Й ДЕНЬ

ПРЕДПРАЗДНСТВО ПРЕОБРАЖЕНИЯ ГОСПОДА НАШЕГО ИИСУСА ХРИСТА И СВЯТАГО МУЧЕНИКА ЕВСИГНИЯ

НА ВЕЧЕРНИ

На Господи, возвах: стихиры предпразднства, глас 4.

Подобен: Дал еси знамение:

Приидите, взыдем со Иисусом, * восходящим на гору святую, * и тамо услышим глас Бога Живаго, * Отца Пребезначальна, * облаком светлым свидетельствующ Божественным Духом * Того свойство присносущнаго сыновства, * и, умом просвещаемы, * в свете Свет узрим.

Приидите, предликуем, * и себе очистим, * и верно уготовим к Божественному восходу * превышняго Божия жительство, * яко да самовидцы Того величества явимся * и славу получим, * юже видети сподобихся апостолов предызбранныи * тайно на горе Фаворстей.

Приидите ныне, * лучшим изменшися изменением, * себе наутрие добре уготовим * на гору предвыйти Божию святую, * неизменно Христову славу блистающую узревше * ясно паче солнца, * и, Троичным озаряеми Светом, * о сем прославим того схождение.

Ины стихиры мученика, глас тойже.

Подобен: Яко добля:

Обагрився кровию плоти твоея, * одаяся еси в порфиру, славне, * Божественныя благодати * и верх твой венцем обложил еси нетления жизни. * Креста же победу, мучениче всемудре, * десницею обнося, якоже скиптро, * со Христом царствуеши, всегда веселяся.

Воин непобедим познан был еси, Евсигние: * Крестным бо оружием ограждаемь, * к борением изшел еси врага борца * и низложил еси того, * воевав светло * и венец прием победы * от единого Подвигоположника и Владыки * и присно царствующаго.

Честными твоими страстьми * страсть честную, славне, * страдальче Евсигние, изобразил еси * и, победоносец быв, * в Вышней митрополии со всеми живещи стратотерпцы, радуяся * и обожаяся причастием Божественным. * Сего ради честное твое и святое совершаем торжество.

Слава, и ныне, глас 5:

Приидите, взыдем на гору Господню * и в дом Бога нашего, * и узрим славу преображения Его, * славу яко Единороднаго от Отца, * светом приимем Свет * и, возвышени бывше Духом, * Троицу Единосущную воспоим во веки.

Аще суббота, И ныне, догматик гласа.

На стиховне стихиры, глас 2.

Подобен: Доме Евфрафов:

Сиянием добродетелей * просвещшися, * произыдем на гору святую, * да узрим Божественное * Господне преображение.

Стих: Милость и истина сретостеся, * правда и мир облобызастеся.

Знамение боголепно * Божества показывает * прежде Креста таинником, * яко солнце облистав, * Христос на горе днесь.

Стих: Блажени людие, * вѣдущии воскликновение.

Естество, еже во Адаме, * Христос изменил хотяи * на гору ныне * восходит Фаворскую, * да обнажит таинником Божество.

Слава, и ныне, глас тойже. Самогласен:

Иже на горе Фаворстей * преобразивыйся во славе, Христе Боже, * и показавый учеником Твоим * славу Твоего Божества, * озари и нас светом Твоего познания * и настави на стезю заповедей Твоих, * яко един Благ и Человеколюбец.

Тропарь, глас 4:

Христово преображение предусрящем, * светло торжествующе предпразднственная, вернии, и возопиим: * приспе день Божественнаго веселия: * восходит на гору Фаворскую Владыка, * Божества Своего облистати красоту.

НА УТРЕНИ

На Бог Господь: тропарь предпразднства, трижды.

По 1-й кафизме седален, глас 4.

Подобен: Явился еси:

Праздник пресветел Владычень прииде, * приидите вси, на гору, умно предочистившися, взыдем Фаворскую, * Христа видети.

Слава, и ныне, тойже.

По 2-й кафизме седален, глас 4.

Подобен: Удивися Иосиф:

Предпразднства день, вернии, днесь * светло славнаго и страшнаго преображения Христова совершающе, согласно возопием: * смешение наше преобрази, Спасе, Божественною Твоею плотию сооблистав тому, * и отдаждь первейшее достояние нетления, яко Милосерд, * да Тя вси славословим, единого Бога нашего.

Слава, и ныне, тойже.

Канон предпразднства со ирмосом на 6, и трипеснец на 4, и святаго на 4. Подобне поем 8-ю и 9-ю песни, 3-ю же и прочия песни, даже до осмыя, предпразднства со ирмосом на 8 и святаго на 4. Аще случится предпразднство в Неделю, трипеснец выпеваем на повечерии.

Канон предпразднства, глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

Да облистает доле свет небо паче солнца, и земля да слышит глаголы Живаго Бога, сыновство преобразуемаго: Отец бо свидетельствует на горе Фаворстей.

Человек зримый, но Бог крыемый, на Фавор Христос восходит, Божества зарю обнажая, еже паче солнца, славы светлостьюми.

Разумно ныне предгрядет явитися Моисею Христос, славы видение показуя на горе Фаворстей лицом к лицу неходатайственной беседою, радующися, днесь предпразднуем.

Трипеснец, глас тойже.

Песнь 1

Ирмос: Воспою Тебе, Господи Боже мой, * яко извел еси люди из работы египетския, * покрыл же еси колесницы фараоновы и силу.

Сей предпразднственный день совершающе, вернии, преображения Христа, Избавителя нашего, восплецим песньми.

Вход постигши святаго преображения Христова, и мы облистаетеся Божественными изменении, сие обლობызающе.

По нынешнем Христос дни, поемь ученики, на гору восходит и, тамо преображся, облистает Божеством.

Гору Фаворскую, приидите вси, достигше умно, Христа узрим, пред ученики Своими страшно преобразующися.

Яко Давид пророк, вопиет Ти: Фаворская гора и Ермон о твоём Имени, Христе, возрадуются, в преображении Твоём.

Гору превысокую – сердце, очищено от страстей, имущии, узрим Христово преображение, просвещающее ум наш.

Троицен: Троицу прославим православно, со Отцем Сына и Духа Святаго, Едино Божество, Единицу Триипостасную.

Богородичен: Матерь и Деву Тя православно исповедуем, вернии, неизреченно рождающую Христа Бога нашего, единого Многомилостиваго.

Канон святаго, глас 8.

Песнь 1

Ирмос: Поим Господеви, * **проведшему люди Своя сквозе Черное море, * яко Един славно прославися.**

С преславными чинми ангельскими, преславне, сый, непрестанно память твою славящая спасай.

Храм Утешителей освященный твой ум, страстотерпче, показася, сего ради ты верою почитаем.

Умерщвление живоносно плотию Пострадавшаго изобразил еси плотию твоею, преблаженне, и истинней жизни сподобился еси.

Державу беззаконующих, укреплься духом, низложил еси и законы Господни, преславне мучениче, удержал еси.

Богородичен: Разрешися клятва, преста же печаль рождеством Твоим, Всеблагословенная Отроковице, верных веселие, Пренепорочная.

Песнь 3

Ирмос: Твоя песнословцы, Богородице, * **Живый и Независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.**

Владычествуй тварию всею, виден бысть, зрак раба прием, имже Божества неприступное сияние учеником показал ешь, якоже вмещаху зрети.

На гору идет облистати славы Солнце, Христос, и свыше сияющую денницу омрачити светом, Егоже зарями сияюще, предпразднуим днесь.

Живота вечнаго исполняя глаголы, предста Христос, показуя в Себе вещи другом разумети, якоже благоволи, Отческую славу блистающую.

Ин

Ирмос: Ты еси утверждение * **притекающих к Тебе, Господи, * Ты еси Свет омраченных, * и поет Тя дух мой.**

Стал еси пред судищем, исповедуя Бога Царя, мучениче мудре, плоть взявшаго, и человеки наздавшаго.

Жертва непорочна, всесожжена угльми мученическими, иже от Девы принесеса Углю.

Водами духовными наводняем, славне, мутная многобожия изсушил еси струи.

Богородичен: Все мое желание к Тебе движу, Чистая Владычице, плотских похотей мя вскоре премени.

Седален святого, глас 4.

Подобен: Скоро предвари:

Мученика Евсигния похвалим, * яко всю упразднившаго лествь силою Христовою и веру уяснившаго: * претерпе бо муки поистинне, и обличи мучителей суровство все, * и венец победы десницею Божиею прият.

Слава, и ныне, предпразднства, глас тойже.

Подобен: Удивися Иосиф:

Готовися ныне, Фаворе, се бо грядет Христос, * Божества зарю паче ума показати на тебе славным учеником, якоже можаху. * Илия и Моисей страхом предстояста, облак же Света осеняше, * и глас слышашеся свыше от Отца Светов, глаголющ: * Сей есть Сын Мой возлюбленный, Того послушайте.

Песнь 4

Ирмос: Седяй в славе на престоле Божества, * во облаце легце * прииде Иисус Пребожественный * Нетленную Дланию и спасе зовущия: * слава, Христе, силе Твоей.

Небесный лик с земными радуется и предпразднует Светодавца сияние, Иже несказанно облистает, изменяя человеческий зрак на Фаворе, якоже благоволи.

Богочеловечным пришествием человеком приближився, чудес зарею мир тайно просветил еси, блистающеюся же славою Божества просиял еси на Фаворе неприступным Светом.

Иисус, Навин сын, первее солнце устави, прообразуя день Божественныя страсти, Сам же, Спасе, прежде Честнаго Креста Твоего, сияния скрыл еси солнца зарями Божественными лица Твоего.

Ин

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Дремание отринув уныния, мучениче Евсигние, бодренно к страданию несумненной верою дерзнул еси.

О Господе Спасе твоём, мучениче, радуясь, досточудне, муки телесныя, яко пищу сладку, ты вменил еси.

Гордое шатание за злобу поползшагося, страсотерпче, низвергл еси, Божественными нравами смиряся.

Воин непобедим явился еси, во бранех подвизаяся, скончав же мучение, враги безплотныя потребил еси.

Богородичен: Равносильна, сопрестольна родила еси Слова Отцу и Духу, Егоже моли спасти мя, Пресвятая Отроковице, Приснодево.

Песнь 5

Ирмос: Ужасошася всяческая * о Божественней славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Христу, радующеся, верно последуем: се бо идет к горе, ученики лучшия с Собою ведый, пред нимиже неприступною добротою возсияв паче солнца, показа славу Свою.

Да просветится днесь небо светлейше восходом, еже к горе, отонудуже облистает Христос неприступным Светом, солнечныя лучи славою Божества омрачая, яко света Податель.

Таинство показа Христос учеником на Фаворе, просияв паче зари лицом, одеждою же риз Своих убелився светло, яко снег, одевайся, яко ризою, светом псаломски.

Ин

Ирмос: Утреннююще, вопием Ти: * Господи, спаси ны, * Ты бо еси Бог наш, * разве Тебе, иного не вемы.

Искренно прилепляяся, премудре, Владыце, себе удалил еси от лукавствия, Евсигние.

Мертвым капищем чести не принесл еси, Богоносе, Бога жива, Господа на Небесех ведый.

На древе воздвижен, мучениче доблемудренне, страсть изобразил еси Безстрастнаго верою.

Богородичен: Слово во утробе Твоей, Чистая, воплощается, безсловесных плотских страстей мир избавляя.

Песнь 6

Ирмос: Божественное сие и всечестное * совершающе празднество, * Богомудрии, Богоматере, * приидите, руками восплецим, * от Нея рождашася Бога славим.

Чертог славы будущия радости другом готовя, восходит на гору Христос, к житию Небесному от жизни, долу влекущия, возводя их.

Удивляя разум Христос учеников, небесное на земли сияние облиста, закон и пророков раболепно представляя начальники, имиже мертвым и живым свидетельствуется Бог.

Светильник явится ныне грядет, Христос, в темнем месте сиянием Божественнаго блистания, Егоже к сиянию идем, прямо лицу Его радующеса.

Ин

Ирмос: Молитву пролию ко Господу * и Тому возведу печали моя, * яко зол душа моя исполнися * и живот мой аду приближися, * и молюся, яко Иона: * от тли, Боже, возведи мя.

Разумения истинная в сердца благородными полож образы, не неведый разумения, блаженне, вражия, на судище потекл еси и погубил еси крестным всеоружием сего воинство.

Демонов служителие, служителя тя Троице разумевше, мукам, и темницам, и неправедней смерти предают, мучениче Евсигние, но побеждаются твоим непобедимым сопротивлением, пребогате.

Потоцы кровей твоих, мучениче, мутныя беззакония потоки, и реки безбожия лестныя, и лукавыя изсушиша струи исцелений же верным неизчерпаемая пучина явишася.

Богородичен: Изсушивши сады злобы в Тебе прозябением Слова, Мати Чистая, из корене души моя лукавья мысли отсецы и насади добродетелей красная, Дево, прозябения.

Кондак, глас 4.

Подобен: Явился еси:

Божественным днесь преобращением * человеческое все естество просиявает божественно, в веселии зовущее: * преобразуется Христос, спасаяй вся.

Икос: Преобращением Божественным зрак наш, иже древле тлением растленный во адовых сокровищах праотца Адама, днесь Зиждитель из тли возведе, обожает наш разум, пребывает же Бог вкупе и Человек, естества каяждо соединена нося непреложна же и нераздельна. Темже ныне на Фаворе несказанно сияет и из всяя плоти дает лучи Божества Своего, просвещая вопиющия: преобразуется Христос, спасаяй всех.

Песнь 7

Ирмос: Не послужиша твари Богомудрии * паче Создавшаго, * но, огненное прещение мужески поправше, * радовахуся, поюще: * препетый отцев Господь и Бог, благословен еси.

К предложению от земли, на высоту восходящему, ученик избранию последуем, Христово смотряюще странное видение. Удивльшеся же с ними, возопием: Боже, благословен еси.

Осквернишееся очистил еси естество человеческое водою же и огнем, Твоею плотию сего светлость показуещи, Спасе, лицом Твоим просияв паче солнца во образ будущия славы.

Выдем со Христом на гору святую, возводящим Зеведеевы сыны и Петра лучшаго, ихже избра славе Своей свидетели, зовущия: Боже, благословен еси.

Ин

Ирмос: Отроцы еврейстии в пещи * попраша пламень дерзновенно * и на росу огонь преложиша, вопиюще: * благословен еси, Господи Боже, во веки.

Кровьюми, мучениче, излиянными любве ради Христа воплощагося, просветив твою душу, к Сему преставился еси, вопия, радуяся: Боже, благословен еси.

Горя любовию Спаса, избежал еси пропасти нечестия и зиму лютых претерпел еси мук, взывая, Евсигние: Боже, благословен еси.

Еще текущим каплям, преславне, Божественных твоих кровей, Владыце Христу предстал еси, воспевая: благословен еси, Господи Боже, во веки.

Да Божественнаго Царствия вечную жизнь наследивши, временнаго живота славы возгнушался еси, вопия, Евсигние: Боже, благословен еси.

Богородичен: Ново родила еси Отроча, Егоже роди Отец прежде век, Богородице Чистая. Емуже вси воспеваем: Боже, благословен еси.

Песнь 8

Ирмос: Отроки благочестивыя в пещи * Рождество Богородичо спасло есть, * тогда убо образуемое, * ныне же действующее, * вселенную всю воздвизает пети Тебе: * Господа пойте, дела, * и превозносите Его во вся веки.

Кто не удивится, Всецарю славы, великолепию славы Твоея, в неже преобразяся, показал еси другом Твоим, Божественными светлостями облистав их? С нимиже предпразднующих верою уясни Светом Твоим нас, Тя поющих.

Высоту Небеснаго жития и славы присносущныя Божественное сияние даруй рабом Твоим, ныне предпразднующим Твоего преобразования светлое торжество, в неже Свет облистая, уясняеши Тя воспевающия, Христе Светодавче.

Света Податель и Свет сый непреступен, Присносущне, Пребезначальне, одеяйся Светом, якоже ризою, свет в мире просиял еси, с плотию пришед, и Свет на горе облистаеши, славы Отчия показав образ.

Ин

Ирмос трипеснца: Царя Христа, * Егоже исповедаша плененнии отроцы, * в пещи глаголюще велиим гласом: * вся дела, пойте Господа.

Господня светлаго преобразования настоящий день облистав, мирови повелевает вопити: вся дела, пойте и превозносите Его во веки.

Мыслию, вернии, приидите, пойдём к горе святей видети преобразование Христово всесветлое: вся бо просвещает, славословящия сие во веки.

Днесь Христову преобразению чистым сердцем предусретение сотворим и возопиим светло: вся дела, Господа пойте и превозносите Его во веки.

Троицен: В Лицех Трех Единое Божество богословим, Отца и Сына и Духа Пресвятаго, купно, вся дела, пойте и превозносите Его во веки.

Богородичен: Царя Христа, Егоже нам роди Дева Мария и по рождестве пребывши Дева Чиста, вся дела, пойте и превозносите Его во веки.

Ин

Ирмос: Победители мучителя и пламене * благодатию Твоею бывше, * заповедем Твоим зело прилежаще, * отроцы вопияху: * благословите, вся дела Господня, Господа.

Щитом, всеблаженне, благочестия всюду ограждаемъ, беззаконнующия победил еси благодатию, поя непрестанно: благословите, вся дела Господня, Господа.

Внегда скорбети тебе, к Богу возвал еси Благодетелю, и услыша тебе, и от лютых избави тя, вопиюща: благословите, вся дела Господня, Господа.

Не богом бездушным честь безсловеснейшу, мучениче, принесл, чиста жертва Богу принесся еси, поя непрестанно: благословите, вся дела Господня, Господа.

Да будущую получиши, премудре, жизнь и славу, умертвился еси мирови и, вопия, Евсигние, уморен был еси: благословите, вся дела Господня, Господа.

Богородичен: Милостивая Дево, Бога Премилостиваго порождающая, милости Божественныя вся сподоби, поющия: благословите, вся дела Господня, Господа.

Песнь 9

Ирмос: Всяк земнородный * да възыграется, Духом просвещаемъ, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная, Богородице, * Чистая Приснодево.

Радуйся, небо, от земли возсияющего ныне проведый, Солнца Незаходимаго, и славою Божественною покрыти хотящаго солнечныя светлости; земля же да ликует светло, Небесною зарею и светлостию сияющи и свет бывающи.

Поя Давид Твое преображение, предвозгласи: кто уподобится Тебе, Господеви, глаголя, в сынех Божиих? Ты бо, прославляясь в советех святых, велик явился еси сущим окрест Тебе, страшен в славе Божественнаго зрака.

О Слово Божие, мудрость, и сила, и образ Отеч! О Боже, понимаемый верными, и Человече познаваемый! Твоего преобразования нас сподоби совершити светлое торжество, во свете добрых дел сияющих.

Ин

Ирмос: Тя, Неискусобращную Богородицу, * Небесный чертог, * рождшую Начальника спасения нашего, * песньми величаем.

Сей первовходный день Твоего, Христе, творяще преславнаго и всесветлаго преобразования, песньми Тя величаем.

Усердно, ведяще славное преобразование Господне, озарим духовно помышления наша, сие величающе.

Добрым изменением изменишися, Христовым преобразованием, обрящемся светоявленни добродетелии нашими, сие величающе.

Троицен: Тя, Триипостасную Троицу и Нераздельное Существо, Отца и Сына и Духа Святаго, песньми величаем.

Богородичен: Тя, купину, юже Моисей виде горящую и неопалемую, огонь приемшую Божества, песньми величаем.

Ин

Ирмос: Устрашися всяк слух * неизреченна Божия снизхождения, * яко Вышний волею сниде даже и до плоти, * от девического чрева быв Человек. * Темже Пречистую Богородицу, вернии, величаем.

Крепостию, мучениче, Христовою некрепкаго врага умертвил еси, возносящагося и суетно воистинну ныне шатающагося, и мечному усечению главу преклонил еси, и освятил еси кровным течением землю всю.

Яко украшение всех страдальцев, яко мучеников красота, Евсигние, яко столп непоколебим Церкви, яко ограждение благочестивых преевственно, яко Божественная лепота притекающих к тебе, яко всесветлая звезда, ублажился еси.

Искапают миро пары потов твоих благовонное, Евсигние, и сердца наша, ты чтущих, благоухают, и смрад страстей, бед и скорбей отгоняют, страсотерпче Христов доблий.

Солнце славы, Иисусе, уяснивший память днесь страдальца Твоего, того молитвами просвети, молюся, омрачившуюся мою душу прелестию змииною, да славлю Тя, яко Бога истинна и Человеколюбца.

Богородичен: Просвети, дворе Света, сердца моего очи, молюся, тьмою греховною ослепшия, и приятны Божественным покажи сиянием, да почитаю Тя, да Божественными гласы величаю Тя.

Светилен предпразднства.

Подобен: Небо звездами:

Небо создавый и звездам свет вложивый, днесь на гору Фаворскую возшед, * освещает ученики зарею Божества Своего.

Слава, и ныне, подобен:

Днесь на Фаворе Христос Свет облиста, * днесь свыше шум, глас Отеч, услышан бысть: * Сей есть, вопия, Сын возлюбленный Мой.

На стиховне стихиры, глас 1.

Подобен: Небесных чинов:

Пресвятаго славнаго преображения * предсретение творяще в настоящий день, * Христа славословим, * наше огнем Божества * преобразивша естество * и якоже прежде нетлением облиставша.

Стих: Милость и истина сретостесе, * правда и мир облобызастеся.

На святую гору, приидите, взыдем, * и всесветлое преображение * верою узрим Господне, * Тому верно поклоняющесе, и глаголем: * Ты Бог един еси, воплощсе * и обожив человечество.

Стих: Господи, во свете лица Твоего пойдем * и о имени Твоем возрадуемсе во веки.

Сей есть день предпразднственный, * вонже преобразуетсе Христос, * сущим с Ним Моисею и Илии * и Его учеником на горе Фаворстей, * гласу такову глаголющу: * Сей есть воистинну избранный Мой Сын.

Слава, и ныне, глас 5. Самогласен:

Закона и пророков * Тя, Христе, Творца и Исполнителя свидетельствоваша, * зряще во облаце, * Моисей Боговидец и Илия огнеколесничник * и неопальный небошественник, * в преображении Твоем. * С нимиже и нас просвещения Твоего сподоби, Владыко, * пети Тя во веки.

НА ЛИТУРГИИ

Блаженны предпразднства, песни 3-я и 6-я.

Владычествуяй тварию всею, виден бысть, зрак раба прием, имже Божества неприступное сияние учеником показал есть, якоже вмещаху зрети.

На гору идет облистати славы Солнце, Христос, и свыше сияющую денницу омрачити светом, Егоже зарями сияюще, предпразднуим днесь.

Живота вечнаго исполняя глаголы, предста Христос, показуя в Себе вещи другом разумети, якоже благоволи, Отческую славу блистающую.

Чертог славы будущия радости другом готовя, восходит на гору Христос, к житию Небесному от жизни, долу влекуция, возводя их.

Удивляя разум Христос учеников, небесное на земли сияние облиста, закон и пророков раболепно представляя начальники, имиже мертвым и живым свидетельствуется Бог.

Светильник явится ныне грядет, Христос, в темном месте сиянием Божественнаго блистания, Егоже к сиянию идем, прямо лицу Его радующеся.

Тропарь предпразднства, глас 4:

Христово преображение предусрящем, * светло торжествующе предпразднственная, вернии, и возопим: * приспе день Божественнаго веселия: * восходит на гору Фаворскую Владыка, * Божества Своего облистати красоту.

Кондак предпразднства, глас 4.

Божественным днесь преображением * человеческое все естество просиявает божественно, в веселии зовущее: * преобразуется Христос, спасаяй вся.